



DEPUTACIÓN PROVINCIAL
A CORUÑA

SERVIZO DE PATRIMONIO E CONTRATACIÓN

**Castelo
Conta**

Número 56 /2025

CONVENIO DE COLABORACIÓN ENTRE A DEPUTACIÓN PROVINCIAL DA CORUÑA E A ASOCIACIÓN CULTURAL CASTELO CONTA CORRESPONDENTE Á SUBVENCIÓN NOMINATIVA CONCEDIDA PARA COFINANCIAR O PROXECTO “UN MONTE PARA SEMPRE”.

Na Coruña, a 11 de xullo de 2025, na sede da Deputación Provincial da Coruña.

Ante min, Miguel Iglesias Martínez, Secretario Xeral da Deputación Provincial da Coruña, como fedatario actuante,

REÚNENSE

Dunha parte, Don Valentín González Formoso, Presidente da Deputación Provincial da Coruña.

Doutra parte, Don Álvaro Jesús Pérez Becerra, Secretario da Asociación Cultural Castelo Conta.

Actuando no exercicio dos seus respectivos cargos e na representación que detentan, e recoñecéndose reciprocamente capacidade para obrigarse nos termos deste documento.

MANIFESTAN

1.- A Asociación cultural Castelo Conta é unha entidade de ámbito provincial inscrita no Rexistro de Asociacións da Xunta de Galicia, e conta con máis de dez anos de experiencia na organización de actividades sociais e culturais no entorno do Monte Xalo. Ten sede na parroquia cullerdense de Castelo, e traballa da man doutras asociacións locais como a Comunidade de Montes Veciñais de Castelo e a asociación Castelo Deporte en iniciativas que teñen como principal obxectivo a dinamización e a posta en valor do rural.

2.- De conformidade cos seus estatutos son fins da entidade, entre outros, o desenvolvemento de todo tipo de actividades culturais e festivas, ben na parroquia de Castelo, ben en calquera outro lugar de Culleredo, nas que se aposte pola difusión da riqueza artística do noso país, así como pola promoción da tradición oral e a lingua galega, a promoción social, cultural e económica do medio rural do concello de Culleredo, nomeadamente da parroquia de Castelo, no sentido máis amplo, co fin de participar do seu desenvolvemento, a protección do medio ambiente, e en particular, da diversidade medioambiental do Monte Xalo, a difusión e a promoción, nomeadamente entre a mocidade, de todos aqueles comportamentos e actitudes orientadas á conservación da tradición oral, o respecto do medio ambiente e o rural, así como a educación en todos aqueles valores que contribúen ao mesmo fin.

No ano 2024 a asociación realiza o Proxecto "Un monte para sempre", que consiste no desenvolvemento dun programa de dinamización social, cultural e medioambiental do Monte Xalo, atendendo á necesidade de poñer en valor un das grandes contornas naturais da provincia da Coruña, cuxa extensión comparten os concellos de Culleredo, A Laracha, Carral e Cerceda.

3.- De conformidade co art. 118.d) da Lei 5/1997, de Administración Local de Galicia, é competencia propia das deputacións provinciais, entre outras, a organización de actividades que teñan por finalidade o fomento en materia de cultura, educación e deporte.

5.- A Deputación Provincial da Coruña e a Asociación Castelo Conta coinciden no seu común interese en realizar este proxecto e, por iso, acordan formalizar un convenio de colaboración de acordo coas seguintes.

CLÁUSULAS

I.- Obxecto.

O presente convenio de colaboración ten por obxecto a fixación das bases de outorgamento dunha subvención nominativa por esta Deputación a prol da Asociación cultural Castelo Conta, con CIF G15750813, fixando as condicións que se impoñen por esta administración concedente e os compromisos asumidos pola entidade beneficiaria para o financiamento parcial do Proxecto "Un monte para sempre".

O proxecto configúrase ao redor de oito actividades demostrativas dirixidas a rapazas e rapaces de diferentes grupos de idade.

1.- Un monte con Tik-Tok. Actividade dirixida a rapazas e rapaces de 6 a 12 anos dirixida a conectar o mundo dixital co dos entornos naturais a través da rede social de moda entre a mocidade.

2.- Retratos entre xeracións. Actividade dirixida a todos os rangos de idade previstos (3 a 15 anos), na que se promoverá unha exposición de retratos fotográficos que terá como protagonistas a persoas maiores, habitantes en núcleos rurais, xunto con cativas e cativos procedentes en entornos urbanos.

3.- Microconcertos no monte. Con esta actividade, ofrécese á cativada de entre 3 e 5 anos a posibilidade de asistir, en familia, a un concerto pensado para a súa idade no medio do monte, en contacto coa natureza: debaixo das árbores, nun entorno único e irreplicable para un momento que sempre pagará a pena rememorar.

4.- Unha noite no monte. Unha noite de aventura no monte con acampada incluída e diferentes xogos relacionados coa natureza na escuridade.

5.- Un monte limpo. Unha competición por equipos relacionada coa recollida de residuos no monte que permita falar da importancia da conservación dos entornos naturais e as consecuencias para a natureza dos vertidos.

6.- Videoclip rural. As persoas participantes entrarán en contacto con persoas maiores do entorno rural escollido para aprender cancións tradicionais e interpretar algúns versos cos que compoñer un videoclip interxeracional do que participe xente de todas as idades. O videoclip acadará difusión a través das redes sociais ao remate da actividade, e servirá tamén para difundir

os resultados do resto de accións desta proposta, a través dunha páxina web específica.

7.- Prantar un monte para sempre. En colaboración cos propietarios dos montes nos que se desenvolverá a actividade, destinaranse determinadas zonas á prantación de especies autóctonas, de xeito que cada participante poida apadriñar unha pranta de xeito compartido cun adulto do lugar, que ao longo dos seguintes meses poida enviarlle fotografías da súa evolución.

8.- Vivir aquí. Nesta actividade dirixida ás nenas e nenos de todos os rangos de idades, as e os participantes compartirán, en grupos, un xantar ou unha cea cunha familia que habite no entorno rural escollido.

II.- Orzamento de gastos da actividade a realizar pola entidade beneficiaria.

A Asociación cultural Castelo Conta desenvolverá as actividades programadas, segundo se definen na cláusula anterior, consonte ao seguinte orzamento:

| | |
|---|--------------------|
| Consultoría externa para a elaboración de materiais pedagóxicos | 3.000,00 € |
| Servizos profesionais especializados en difusión medioambiental | 2.245,00 € |
| Servizos culturais e contratación de formacións artísticas | 8.010,00 € |
| Deseño de materiais de promoción e difusión | 4.200,00 € |
| Servizo externo de monitores en actividades de tempo libre | 4.950,00 € |
| Servizos de coordinación de produción | 12.490,00 € |
| Servizo de comunicación e xestión da campaña de promoción | 8.100,00 € |
| Impresión e rotulación | 5.000,00 € |
| Contratación de publicidade | 3.120,00 € |
| Fotógrafos | 2.200,00 € |
| Videógrafos | 3.600,00 € |
| Medios técnicos audiovisuais e de son para o desenvolvemento das actividades | 11.770,00 € |
| Compra de materiais non inventariables para o desenvolvemento das actividades | 865,00 € |
| Total orzamento | 69.550,00 € |

III.- Financiamento provincial e outros ingresos que se obteñan ou aporten para a mesma finalidade.

1.- A Deputación Provincial da Coruña contribuirá ao financiamento da actividade, tal como se define na cláusula primeira, cunha achega máxima de **40.000,00 €**, o que representa unha porcentaxe do 57,51258%.

A cantidade restante, ata alcanzar o importe total do orzamento da actividade, está financiada con cargo a recursos propios ou alleos, acreditando a entidade beneficiaria que ten consignado o crédito axeitado e suficiente para imputar a totalidade do gasto correspondente á entidade.

No caso de que o gasto xustificado non acadase o importe total previsto na cláusula segunda, a Deputación achegará o importe que represente o 57,51258% da cantidade efectivamente xustificada.

2.- Agora ben, se a cantidade xustificada resulta inferior ao 75% do orzamento previsto na cláusula segunda, entenderase que a finalidade básica da subvención non foi cumprida e perderase o dereito ao seu cobro.

3.- O importe do financiamento provincial farase efectivo con cargo á aplicación orzamentaria 0612/3264/481, na que a Intervención provincial ten certificado que existe crédito dabondo sobre a

que se ten contabilizado a correspondente retención de crédito.

4.- A subvención da Deputación é compatible coa percepción doutras subvencións ou axudas, públicas ou privadas, que a Asociación cultural Castelo Conta obteña para a mesma finalidade, sempre que o seu importe, xuntamente co da subvención provincial, non supere en ningún caso o importe total do gasto efectivamente xustificado.

5.- No caso de que a concorrencia de axudas ou subvencións supere o importe do gasto efectivamente xustificado, minorarase a achega provincial no importe necesario para darlle estrito cumprimento ao apartado anterior.

IV.- Contratación da execución.

1.- O outorgamento dos contratos de servizos, asistencia ou subministracións necesarios para a execución da actividade corresponderalle á Asociación cultural Castelo Conta.

Non se poderá contratar a realización de prestacións con persoas o entidades vinculadas á Asociación cultural Castelo Conta, nin con calquera outra na que conorra algunha das circunstancias ás que se refire o artigo 29.7 da Lei 38/2003, de 17 de novembro, xeral de subvencións.

2.- Se o importe dalgunha das prestacións supera 15.000 €, con carácter previo á contratación, a Asociación cultural Castelo Conta deberá solicitar polo menos tres orzamentos a distintos provedores; entre as ofertas recibidas, deberase elixir unha delas de acordo con criterios de eficiencia e economía, debendo xustificarse expresamente nunha memoria a elección cando non recaia sobre a oferta máis vantaxosa economicamente.

V.- Publicidade do financiamento provincial.

1.- Na publicidade pola que se dea a coñecer a realización das actividades, ben sexa por medios escritos, radiofónicos, audiovisuais ou internet, deberase facer constar sempre o financiamento da Deputación Provincial da Coruña.

2.- Coa memoria e conta xustificativa achegaranse documentos que acrediten o cumprimento desta obriga da Asociación cultural Castelo Conta.

VI.- A xustificación necesaria para recibir a achega provincial.

A achega da Deputación seralle abonada á Asociación cultural Castelo Conta unha vez que se presente de xeito **telemático** (a través da plataforma subtel) a seguinte documentación:

* **Memoria** de actuación, subscria polo representante legal da Asociación cultural Castelo Conta, xustificativa do cumprimento das condicións impostas neste convenio, coa indicación das actividades realizadas e dos resultados obtidos.

* **Relación clasificada dos gastos** realizados (con IVE e sen IVE), no que se indiquen os acredores co seu NIF, os documentos xustificativos, os importes e, no seu caso, datas de pago; tamén se indicarán as desviacións con respecto ao orzamento detallado na cláusula segunda.

Con esta relación achegaranse copia das facturas e demais xustificantes de gasto.

Os gastos e as correspondentes facturas referiranse exclusivamente ás actividades realizadas durante o ano 2024.

* **Certificación** da aprobación das facturas e demais documentos xustificativos polo órgano competente.

* **Acreditación** do cumprimento das obrigas tributarias e coa Seguridade Social, segundo o previsto na cláusula oitava.

* **Declaración** doutras axudas ou subvencións solicitadas ou concedidas para a mesma finalidade.

* **Declaración** de si a entidade está ou non exenta do IVE.

* **Certificación** da conta bancaria, segundo o modelo aprobado pola Deputación.

Acreditación do cumprimento das obrigas asumidas na cláusula quinta, mediante a presentación de documentos nos que conste a publicidade do financiamento provincial.

VII.- Termo para a realización da actividade e prazo de xustificación.

1.- As actividades que son obxecto de financiamento provincial, tal como están descritas na cláusula primeira deberán estar rematadas o **31 de decembro de 2024**.

2.- Unha vez rematadas as actividades, a Asociación cultural Castelo Conta deberá presentar a xustificación documental á que se refire a cláusula sexta antes do **30 de outubro de 2025**.

3.- De conformidade co disposto no artigo 70.3 do Regulamento da Lei de subvencións (Real decreto 887/2006, do 21 de xullo), transcorrido este derradeiro prazo sen que se teña recibida xustificación ningunha, a Unidade xestora remitiralle un requirimento á Asociación cultural Castelo Conta para que a presente no prazo improrrogable de **quinze días**.

A falla de xustificación da subvención neste prazo excepcional suporá a perda da subvención e demais responsabilidades previstas neste convenio e na lexislación aplicable ao respecto. Aínda así, a presentación da xustificación neste prazo adicional non eximirá á Asociación cultural Castelo Conta da sanción que, de conformidade co disposto na Lei de subvencións e na ordenanza provincial de desenvolvemento que resulte aplicable, lle poida corresponder.

4.- O abono da subvención materializarase mediante ingreso na conta da entidade financeira indicada pola Asociación cultural Castelo Conta na documentación aportada.

VIII.- Acreditación do cumprimento das obrigas tributarias e coa Seguridade Social.

1.- A Asociación cultural Castelo Conta deberá acreditar, con carácter previo á sinatura deste convenio e logo, con carácter previo ao pago da subvención, que se atopa ao día no cumprimento das obrigas tributarias coa Administración do Estado, coa Comunidade Autónoma e coa Seguridade Social; e, para tal fin poderá autorizar á Deputación a que obteña telemáticamente os correspondentes certificados.

2.- A acreditación do cumprimento das obrigas tributarias coa Deputación Provincial determinarase de oficio por esta.

IX.- Destino e manexo dos fondos recibidos.

1.- A Asociación cultural Castelo Conta destinará os fondos recibidos ao pagamento dos

xustificantes de gasto presentados.

2.- Co fin de garantir un axeitado control da aplicación dos fondos, o pagamento deberá quedar acreditado documentalmente mediante a utilización de transferencia bancaria, tarxeta de débito ou crédito, cheque nominativo ou calquera outro medio que deixe constancia da data de pago e da identidade do perceptor; só excepcionalmente se poderá realizar o pago en metálico para gastos de ata 150 €, nos que non resulte posible a utilización dun dos medios anteriormente indicados.

3.- Sen prexuízo dos libros e rexistros contables que as normas xerais ou sectoriais lle poidan impor, a Asociación cultural Castelo Conta deberá contar polo menos cun rexistro cronolóxico de cobros e pagamentos nos que se inclúan, entre outros, os relativos aos gastos xustificadas e aos ingresos declarados con respecto a esta subvención.

X.- Control financeiro da Deputación e dos órganos de control externo.

1.- Consonante ao disposto nos artigos 44 e seguintes da Lei 38/2003, de 17 de novembro, xeral de subvencións, e nos artigos 41 e seguintes da Lei 9/2007, de 13 de xuño, de subvencións de Galicia, a Asociación cultural Castelo Conta poderá ser escolleita pola Intervención provincial para a realización dun control financeiro sobre a subvención pagada, co fin de acreditar a efectiva aplicación dos fondos á finalidade para a que foron concedidos, o correcto financiamento da actividade e o cumprimento de tódalas demais obrigas formais e materiais que lle impón o presente convenio de colaboración.

2.- Asemade, de acordo co previsto na lei 6/1985, de 24 de xuño, do Consello de Contas de Galicia, a Asociación cultural Castelo Conta queda sometida aos procedementos de fiscalización que leven a cabo o Consello de Contas de Galicia ou, no seu caso, segundo o previsto na Lei orgánica 2/1982, de 12 de maio, aos procedementos de axuízamento contable que poida incoar o Tribunal de Contas, e a calquera outro órgano de control, nacional ou europeo.

XI.- Reintegro, infraccións e sancións.

1.- O incumprimento dalgunha das cláusulas previstas no presente convenio de colaboración poderá implicar a obriga de reintegro parcial ou total dos fondos recibidos, así como ao pago dos xuros de demora que se perciban dende o día no que se realizou o pagamento ata o momento no que se acorde a procedencia do reintegro. O procedemento de reintegro iniciárase de oficio na súa tramitación seguirase o disposto nos artigos 41 e seguintes da Lei 38/2003, de 17 de novembro, Xeral de subvencións e nos artigos 91 e seguintes do seu Regulamento (R.D. 887/2006, do 21 de xullo), dándolle en todo caso audiencia ao interesado.

2.- Sen prexuízo do anterior, o dito incumprimento tamén poderá ser constitutivo dalgunha das infraccións tipificadas na Lei 38/2003, de 17 de novembro, ou na Lei 9/2007, de 13 de xuño, de subvencións de Galicia, séndolle de aplicación o cadro de sancións previstos nas normas citadas e na ordenanza provincial de desenvolvemento que resulte aplicable.

3.- Para os supostos de atraso na realización das actividades ou atraso na presentación da xustificación se estará ao disposto na ordenanza provincial de desenvolvemento que resulte aplicable.

XII.- Incorporación ao rexistro público de subvencións e publicación da subvención concedida.

1.- No cumprimento do disposto no artigo 20.1 da Lei 38/2003, xeral de subvencións, e demais normativa de desenvolvemento, os datos da subvención concedida e a identificación da

Asociación cultural Castelo Conta serán remitidos á Intervención xeral do Estado, para que sexan incorporados á Base de Datos Nacional de Subvencións, coa exclusiva finalidade disposta no precepto e co debido respecto á protección de datos de carácter persoal, segundo o previsto na Lei orgánica 3/2018, do 5 de decembro, de Protección de Datos Persoais e garantías dos dereitos dixitais, en tanto non se opoña ao Regulamento (UE) 2016/679 do Parlamento Europeo e do Consello de 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se Derroga a Directiva 95/46/CE (Regulamento Xeral de Protección de Datos).

2.- Asemade, no cumprimento do disposto no artigo 16.3 da Lei 9/2007, de 13 de xuño, de subvencións de Galicia, a Deputación remitiralle a mesma información á Consellería de Economía e Facenda, co fin de que a incorpore ao rexistro público de axudas, subvencións e convenios da Comunidade Autónoma de Galicia.

3.- Segundo o previsto no artigo 18 da Lei 38/2003, de 17 de novembro, xeral de subvencións, a concesión da subvención á Asociación cultural Castelo Conta será publicada no Boletín Oficial da Provincia da Coruña e na páxina web dacoruna.gal.

4.- Un exemplar deste convenio, debidamente asinado, será incorporado ao rexistro de convenios que depende do Servizo de Patrimonio e Contratación da Deputación.

XIII.- Vixencia do convenio, prórroga ou modificación.

1.- O prazo de vixencia do presente convenio finalizará o **30 de novembro de 2025** e terá efectos retroactivos, polo que as actividades contempladas nel poderán terse realizado dende o 1 de xaneiro de 2024.

Esta vixencia queda subordinada á existencia do crédito adecuado e suficiente que para o Exercicio 2025, autorice o correspondente Orzamento.

2.- Previa solicitude da Asociación cultural Castelo Conta, realizada polo menos dous meses antes da data do fin do prazo de vixencia, o convenio poderá ser prorrogado por acordo expreso de ambas as dúas partes, e previos os informes preceptivos da Unidade xestora, do Servizo de Patrimonio e Contratación, da Secretaría e da Intervención da Deputación.

3.- Tamén por acordo expreso de ambas as dúas partes e por causa debidamente xustificada, e previos os mesmos informes indicados no apartado anterior, o convenio poderá ser obxecto de modificación.

XIV.- Natureza, interpretación, modificación e xurisdición competente.

1.- O presente convenio ten natureza administrativa e para resolver as dúbidas que xurdan na interpretación das súas cláusulas aplicaranse as disposicións contidas na Lei 38/2003, de 18 de novembro, xeral de subvencións, e na Lei 9/2007, de 13 de xuño, de subvencións de Galicia; suplementariamente aplicarase a lexislación de contratos do sector público.

2.- A interpretación das dúbidas e lagoas que poidan xurdir na aplicación do presente convenio corresponderalle ao Presidente da Deputación, previos os informes preceptivos da Unidade xestora, da Secretaría e da Intervención provincial.

3.- Corresponderalle aos órganos da xurisdición contencioso-administrativa, segundo a distribución de competencias prevista na Lei 29/1998, de 13 de xullo, reguladora de dita xurisdición, o coñecemento das cuestións litixiosas que poidan xurdir como consecuencia do

presente convenio.

Faise constar que o presente convenio foi aprobado por acordo plenario de data 27 de xuño de 2025.

E en proba de conformidade asinan por duplicado exemplar o presente convenio no lugar e data indicados no encabezamento.

[Redacted signature]
O PRESIDENTE DA
DEPUTACIÓN PROVINCIAL DA CORUÑA

[Redacted signature]
O PRESIDENTE DA ASOCIACIÓN
CULTURAL CASTELO CONTA

[Redacted signature]
Asdo. Valentin González Formoso

[Redacted signature]
Asdo. Alvaro Jesús Pérez Becerra

[Redacted signature]
O SECRETARIO XERAL
DA DEPUTACIÓN PROVINCIAL DA CORUÑA

[Redacted signature]
Asdo. Miguel Iglesias Martínez